



26. juli 2021

UKA 2021/77

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara.

Qanoq iliorutta inuiaqatigiittut Naalagaaffiit Peqatigiit meeqqat pillugit isumaqatigiissutaanni nr. 2-mi allassimasoq ”Immikkoortitsisoqassanngilaq” nunatsinni atuutsissinnaavarput? Qanorlu meeqqat eqqugaasimasut inuiaqatigiinni akuutinneqartutut misigitissinnaavagut?

(Inatsisartuni ilaasortaq, Aqqalu C. Jerimiassen, Atassut)

Naalagaaffiit Peqatigiit meeqqat pillugit isumaqatigiissutaanni¹ allaqqavoq immikkoortitsisoqassanngitsaq. Meeraq pisinnaatitaaffeqarpoq apeqqutaanani kinaanersoq, qanoq oqaaseqartuunersoq, pisuujunersoq piitsuunersorluunniit. Oqartuarterpugut meeqqat siunissaralugit. Oqartuarterpugut tamakkiisumik iliuseqartariaqarluta meeqqat pisariaqartitsisut sumiginnagaasimasullu ikiorumallugit. Inuiaqatigiinni qinikkaniillu piumassuserujussuaq takutinneqartuarterpoq, qineqqusaarnerillu tamaasa meeqqat salliukkumaneqartarput. Ukiullu arlariit meeqqat ukiorissagaat suaruteqartoqartarsimavoq. Massakkumiilli meeqqat avammut suarutaannaajunnaarnissaat sulissutigisariaqalerparput.

Uani oqallinnermi qitiutinneqassaaq pisariaqarluinnartillugu pisortaniit meeqqat angajoqqaaminniit arsaarinnissutaasarput naliliisoqarsimagaangat angajoqqaavisa meeqqatik paarisinnaanngikkaat. Ilaatigullu meerannguit taakku timikkut tarnikkullu innarlugaasimasarput qaangeruminaalluinnarsinnaasunik. Taamaammallu ulloq unnuarlu angerlarsimaffinni annertuumik tarnikkut ikiorserneqartariaqartarput, inuunerminni ingerlariaqqissinnaalernissaat siunertaralugu. Uani oqallinnermi qitiulluinnarpoq qanoq iliorsinnaanerluta eqqartussallugu taakku meeqqat immikkoortinneqannginnissaat, atuarfinni, inuiaqatigiinni, illoqarfinni, nunaqarfinni, aqqusinermi il.il. Taamaammallu eqqartortariaqarparput qanoq ilaserinninnerulersinnaanersugut. Uanerpiarlu oqallisigissanngilarput meeraq angajoqqaarsiartaassanersoq immaqaluunniit ulloq unnuarlu angerlarsimaffimmiissanersoq.

Meeqqat sakkortuumik ilaatigullu amiilaarnarluinnartunik misigisaqarsimasut tupinnanngitsumik sakkortuumik qisuariartarput misigissutsiminnillu kamassarujussuaminnik aqutsisinnaarpiartaratik. Inuiaqatigiinnilu taakku meeqqat naalanngitsutut isigineqartarput ajattorneqartarlutillu. Ulloq unnuarlu angerlarsimaffinniit meeqqanik asimiititsineq atorluarusunneqartarpoq pinngortitarsuatsinni toqqissisimanartumi avatangiisillu nalinginnaasut ulapaarfiusullu qimalaarlugit misigisaqartitserusunneq atorlugu.

Taamatut meeqqanik pisariaqartitsivissortunik inuiaqatigiinniit ajattuineq ilumut akuersaaginnarsinnaanerparput? Qanoruna iliorluta meerannguit taakku periarfissinniassagut

¹ [Microsoft Word - FN boernekonv kal \(naalackersuisut.gl\)](#)



siunissami inuiaqatigiinnut akuutilernissaanni avatangiisiisa narrugalugillusooq ajattortuassappatigit?

Meeqqat imaannaangivissortunik amiilaarnartunillu misigisaqarsimasut pinerluttuliornissaminnut qanissinnaasarput, allat pigisaannik aserortersinnaasarput kamassaqarmata, naak annertuumik nakkutigineqaraluarlutik. Nukiilli tamaasa atorlugit ulloq unnuarlu angerlarsimaffiit sukataartuaraluartut katsorsaanikkullu ingerlataqarlutik, meeqqat sapinngisamik ajunngitsumik siunissaqartikkumallugit. Meeqqanut taamatut innuttaasuniit akeqqersimaartarnerinnaanngilaq aammattaaq ulloq unnuarlu angerlarsimaffinnut inuiaqatigiinniit pisortaniillu akeqqersimaartarneq ajattuinerlu takussaasarpoq, ilaatigullu allaat aningaasannanniaannarfittut isigineqartarlutik.

Qanoq ilillutik meeqqat pitsaasumik siunissaqartissinnaavagut ajattorneqartuarunik nunaqqatiminniik avatangiisiminniillu? Meeqqanngooq taakku naalanngimmata aserortersarmatalu kissaatigineqannginnamik tikilluaqqusaanngillat. Taava imaannerpa meeqqat taakku mattusimalluinnartariaqartut asimiinniarunik? Meeqqap pisariaqartilluinnarpaa toqqissisimanartumik avatangiiseqarnissani tikilluaqqusaasutullu misigitinneqarnissani. Aatsaat innuttaaqataasugut paasinnilluta ikioqataalerutta ilaserinnillutalu taakku meerannguit ajunngitsup tungaanut ingerlariartissinnaavagut.

Taamaammat iliuusissarput tassaasorilluinnarparput tamatta tamavitta innuttaaqataasusugut tikilluaqquserpalaartumik pissuseqalerutta ajattuinalu. Inoqatitsinnik isiginnittariaaserput eqqarsaatigilluartaqarparput.